

Si mai 1644 *Luce*
DECLARATION

DV ROY,

Case 568

PORTANT DEFENSES DES
Passemens d'Or, d'Argent, Dentelles
& ouvrages de Fil des pais estrangers:
Et Reglement sur les Estoffes & fa-
çons d'Habits. *du d'auin May 1644.*

*Verifiée en Parlement, le dix-neufiesme iour
d'Aoust, mil six cens quarante-quatre.*



A PARIS,

Par Iacq. DUCAST, Imprimeur & Libraire
ordinaire du Roy, demeurant rue de la Bouclerie,
au bout du Pont S. Michel, à l'Olivier.

M. DC. XLIII.

Avec Privilege de sa Majesté.

NOTTAMPTON

THE NEWBERRY LIBRARY

Case
F
39
326

1644 for

THE NEWBERRY
LIBRARY

A B A B A B

M. J. J. J. J.



L OVIS PAR LA GRACE
DE DIEU, ROY DE FRANCE
ET DE NAVARRE, A tous
ceux qui ces presentes Lettres
verront, Salut. Comme il n'y a point de
cause plus certaine de la ruine d'un Estat
que l'excès d'un luxe déreglé, qui par la
subuersion des familles particulieres atti-
re necessairement celle du public : Aussi
ne voulons nous rien obmettre de tout
ce qui peut tesmoigner le desir que nous
auons de preuenir ce mal, & d'en preser-
uer nostre Royaume par de bonnes &
seueres Loix: En quoy nous nous som-
mes d'autant plus confirmez, que ce se-
roit en vain que nous trauaillerions à
soustenir par les armes la gloire & la
grandeur de cét Estat, si cependant nous

souffrions qu'il fust affoibly par le dérèglement de ceux qui ne gardent aucune mesure en leurs vaines & excessiues dépenses. Outre que c'est chose digne de nostre soin, de ne permettre point qu'au milieu des necessitez publiques, & pendant que la pluspart de nos Sujets sont incommodéz par les Imposts & les Subsidies extraordinaires, les autres fassent montre de leurs richesses, & les employent avec profusion en des superfluitéz & des vanitez inutiles; au lieu qu'ils les pourroient plus vtilement faire seruir au public, & les reseruer pour le secours de leur Patrie. Pour arrester doncques le cours de ce desordre, & apporter des remedes à ce mal auant qu'il ne soit fortifié par la licence & par le temps; Nous auons considéré que les dépenses où le Public est plus interessé, se font aux habits, où l'on employe les estoffes & les passemens d'or & d'argent, & aux ouurages de fil qui viennent des païs estran-

gers : de sorte qu'outre le transport de nos monnoyes employées à l'achapt de telles estoﬀes, il se consomme encores dans nostre Royaume vne grande quantité d'or & d'argent que l'on conuertit en de semblables ouurages , dont il n'en reuient au Public aucune vtilité , mais au contraire vn tres-notable prejudice, qui est encores augmenté par l'abus de quelques Marchands qui fondent les monnoyes pour les faire entrer dans les manufactures. C'est pourquoy auant que le mal soit plus fort que les remedes , & pour conseruer les richesses dans nostre Royaume , en empeschant la dissipation des biens de nos Sujets, Nous ne desirons pas seulement de renoueller les Edicts qui ont esté cy-deuant faits contre le luxe , mais encores par la rigueur que nous y apportons, Nous en voulons procurer l'exacte obseruation. A CES CAUSES , Sçauoir faisons , Qu'apres auoir mis cette affaire en deliberation en

nostre Conseil : De l'aduis de la Reine
Regente nostre tres-honorée Dame &
Mere, & de nostre certaine science, plei-
ne puissance & autorité Royale, Nous
avons statué & ordonné, statuons & or-
donnons par ces presentes ce qui ensuit.

PREMIEREMENT,

FAISONS tres-expresses inhibitions
& defenses à tous nos Subjets, de quelque
qualité & condition qu'ils soient, de por-
ter es habits ou ornemens, comme cor-
dons, baudriers, ceintures, porte-épées,
éguilettes, écharpes, jartieres, nœuds,
rubans, tissus, ou tels autres ornemens
qui puissent estre, aucunes estoffes d'or
& d'argent, ou barrées, ou mêlées d'or
ou d'argent fin ou faux, à peine de con-
fiscation desdites estoffes, habits & or-
nemens, & de quinze cens liures d'aman-
de, applicable le tiers à l'Hospital des
lieux, l'autre tiers aux Filles de la Mag-
delaine establies à Paris, & l'autre tiers

aux Officiers qui auront fait les captures.

II.

COMME pareillement, defendons de mettre sur lesdits habits, ou autres ornemens, aucunes piqueures, emboutissemens, chamarures de passément, boutons, houppes, chesnettes, porfileures, canetilles, paillettes, nœuds de soye, ou d'or ou d'argent fin ou faux, trait ou filé, ou de gex, ou autre chose semblable, qui pourront estre cousuës & appliquées en forme de broderie, & dont les habits & autres ornemens puissent estre conuertis & enrichis.

III.

DEFENDONS aussi de faire appliquer sur lesdits habits, ou autres ornemens, aucunes pierreries, perles, boutons d'or ou d'argent, simple ou doré, cuiure ou laton doré ou émaillé, & telle autre

façon d'orfèvrerie, telle qu'elle puisse estre.

IV.

V O U L O N S que les plus riches & somptueux habillemens soiēt de velours, satin, taffetas, & autres estoﬀes de soye, sans autre enrichissement que deux passe-mēs ou dentelle de soye de deux doigts au plus, ou d'une bande de broderie de largeur d'un poulce: lesquelles dentelles ou bande de broderie seront appliquées sur les estoﬀes des habits sans aucune estoﬀe entre deux: sçauoir, sur les habits des hommes, deux à l'entour de leur collet & bas de leurs manteaux, & sur le long & canōs de leurs chausses; ouuerture des manches, haut des manches, au milieu du dos, & le long des boutons & boutonnières, & aux extremitēz des basques des pourpoints ou juppes.

V. **E**T

V.

ET quant aux habits des femmes, filles & enfans portans robes, leſdits paſſemens ou broderie d'un poulce de largeur y ſeront appliquez, ſans pouuoir mettre aucune eſtoffe entre deux, ainſi que deſſus: ſçauoir deux paſſemens & dentelles de la ſuſdite largeur à l'entour du bas & au deuant des robes & jupes, ſur le milieu des manches, autour des baſques & corps des robes & jupes.

VI.

DEFENDONS en outre à tous nos Sujets de quelque qualité & cōdition qu'ils ſoient, de faire porter à leurs Pages, Laquais & Cochers, aucuns habits de ſoye, ou bandes de velours, ſatin ou autre eſtoffe de ſoye: Voulons qu'ils ſoient veſtus d'eſtoffe de laine avec deux gallons ſur les couſtures & extremittez des habits ſeulement.

VII.

FAISONS pareillement tres-expresses inhibitions & defenses à tous Marchands, de traffiquer és païs estrangers d'aucunes estoﬀes, passemens d'or ny d'argent vray ou faux, ny de faire ou faire faire lesdites estoﬀes, passemens, franges d'or ny d'argent vray ou faux, en nostre Royaume, à peine de confiscation desdits ouurages, trois mil liures d'amande, applicable comme dessus, & d'estre declarez indignes d'exercer cy-apres la marchandise, ny autres charges.

VIII.

DEFENDONS à tous Tailleurs, Brodeurs, Carrossiers, Selliers, de faire aucuns ouurages de leur mestier où il y ait aucune broderie, passemens, frange d'or ny d'argent, & generallyment aucun or ny argent vray ou faux, à peine de confiscation desdits ouurages, quinze cens liures

d'amande, & d'estre priuez cy-apres de l'exercice de leur mestier : lesdites amandes & marchandises confisquées & applicables comme dessus.

IX.

DESIRANS pareillement empeschier les dépenses excessiues qui se font en passemens, dentelles & autres ouurages de fil qui viennent des païs estrangers; Nous faisons tres-expresses inhibitions & defenses à tous nos Sujets, de quelque qualité & condition qu'ils soient, de porter, huit jours apres la publication de la presente Declaration, en leurs linges, collets, manchettes, bas à botter, & generalement en tous autres linges, aucuns passemens, dentelles, entretoilles, poincts de Génes, pontignacs, poincts coupez, ou autres ouurages de fil quelconques faits és païs estrangers, à peine contre les contreuenans de confiscation des ouurages qu'ils porteront, & de quinze cens liures

d'amande, applicable comme dessus.

X.

ET dautant que les Marchands Lingers sont la principale cause du luxe & dépenses excessives qui se sont faites par nos Sujets, Nous leur faisons tres-expresses inhibitions & defenses, & à tous nos autres Sujets de quelque qualité & condition qu'ils soient, d'achepter ny faire trafic d'aucuns ouvrages de fil faits hors nostre Royaume, & à tous ouuriers en linge, d'en employer en leurs ouvrages.

XI.

ET en cas de contrauention à nosdites defenses par lesdits Marchands, Voulons que toute la marchandise dont ils se trouveront auoir trafiqué dehors nostre Royaume, soit brulée & lesdits Marchands condamnez en six mil liures d'amande, applicable comme dessus; & priués pour jamais de faire aucun exercice de marchandise,

ny d'aucune autre charge.

XII.

Et afin que lesdits Marchands ne prennent occasion de continuër ledit trafic, supposans que ce sont marchandises qu'ils auoient auant nostre present Edict; Voulons & ordonnons, que quinzaine apres la publication d'iceluy, ils se transportent es Greffes des Iurisdctions ordinaires des lieux où ils seront demeurans & domicilies: pour là affirmer & declarer la quantité qu'ils ont pardeuers eux desdites marchandises estrangeres, dont ils laisseront vn Inuentaie signé d'eux: sur lequel Inuentaie enjoignons ausdits Iuges ordinaires de faire la visite desdites marchandises en presence des Maistres & Gardes de la marchandise, sans que pour ce ils puissent prendre ny exiger aucun salaire.

XIII.

ENJOIGNONS pareillement aux

Maistres & Gardes desdites marchandises, de veiller & tenir la main à ce qu'il ne s'achapte & debite aucunes des marchandises & ouurages defendus, dans les boutiques des Marchands; & faire incontinent le rapport à la Police des contrauentions qui seront faites, à peine d'estre priuez pour leur negligence, de pouuoir jamais exercer la marchandise.

XIV.

V O U L O N S & entendons, que les Sentences & Iugemens des confiscations & amandes, qui seront rendus alencontre des contreuenans à nos presentes defenses soyent executez, nonobstant oppositions ou appellations quelconques, & sans prejudice d'icelles. **S I D O N N O N S** en mandement à nos amez & feaux Conseillers les Gens tenans nos Cours de Parlemens, Baillifs, Senéchaux, Iuges ou leurs Lieutenans, & à tous nos autres Iusticiers & Officiers qu'il apartiendra, que ces presentes

ils facent lire, publier, registrer, executer, garder & obseruer inuiolablement, selon leur forme & teneur. Enjoignons à nos Procureurs Generaux, leurs Substituts y tenir la main, & faire toutes les diligences requises & necessaires pour ladite execution. CAR tel est nostre plaisir. En tesmoin dequoy nous auons fait mettre nostre seal à cescdites presentes. **D O N N E'** à Paris, le dernier iour de May, l'an de grace 1644. Et de nostre Regne le deuxiesme. Signé, **L O V I S**, *Et plus bas*, Par le Roy, la Reine Regente sa Mere presente, **D E G V E N E G A V D**, & scellées sur double queuë du grand seau de cire jaune. *Et encores est escrit:*

Registrées, où y le Procureur General du Roy, pour estre executées, gardées & obseruées selon leur forme & teneur. Enjoint aux Officiers du Chastelet, tenir la main à l'execution d'icelles; Et de trois mois en trois mois les faire lire & publier par cette Ville & Fauxbourgs, à

ce qu'aucun n'en pretende cause d'ignorance: Et que copies collationnées d'icelles seront enuoyées aux Bailliages & Seneschaussées de ce Ressort; Pour y estre leuës, publiées, registrées & executées à la diligence des Substituts du Procureur General, qui en certifieront la Cour auoir ce fait au mois. A Paris en Parlement le 19. iour d'Aoust 1644.

Signé, DV TILLET.

LE Vendredy 26. iour d'Aoust 1644. la Declaration du Roy, & Arrest de Nosseigneurs de la Cour de Parlement cy-dessus, ont esté leus & publiés à son de trompe cry public, par les Carrefours ordinaires & extraordinaires de cette Ville & Faux-bourgs de Paris, par moy Iean Iossier Iuré Crieur ordinaire du Roy en la Ville, Preuosté & Vicomté de Paris, & affichés par tout où besoin a esté, à ce faire j'auois trois Trompettes, commis des trois Iurez Trompettes du Roy esdits lieux. Signé, IOSSIER.